

四庫全書

史部

欽定四庫全書

粵閩巡視紀略卷四

工部尚書杜臻撰

四月癸亥朔始畢粵事次日甲子自潮州發九十里至黃岡又二十里至閩界之分水關詔安境也閩撫金公鉉候於關口先行請安禮乃及閩事議自分水關始循海而東歷漳泉興福而至福寧州

按閩地為中國之東南隅而島番日本正直其外元

明以來時有寇擾故海防為尤重其地在周秦時為越國之支封漢元鼎間始列郡縣然兵制不可考吳長沙王孫策始立南部都尉於建安晉置典船校尉於福州唐開元十九年設泉州府兵至德間復置經略寧海二軍宋置崇節保節二軍指揮及兵馬都監皆統之於郡守故當時典郡者有郡將之名元設萬戶府明高祖洪武二十年命江夏侯周德興經略海上置沿海五衛十二所曰福寧衛領大金定海二所

曰鎮東衛領梅花萬安二所曰平海衛領莆禧所曰  
永寧衛領崇武福全金門中左高浦五所曰鎮海衛  
領六鰲銅山懸鐘三所其隙地支地控馭所不及者  
更置巡司以承其彌縫焉陸路之防既固又作烽火  
南日浯嶼三水寨擁戰艦以備躡寇之用景泰間尚  
書薛希璉奉命巡閱復增小埕銅山二寨謂之五寨  
互為首尾迭相呼應而苞桑之籌益密嘉靖四十二  
年巡撫譚綸以倭警屢作議設總兵及三路參將以

福寧為北路興化為中路漳州為南路而重五寨之  
權各置欽依把總以三舊寨為正兵二新寨為奇兵  
定為分合哨守之制積弛一新隆慶間復設浯銅海  
壇二遊總萬曆四年始設南澳副總兵又置懸鐘遊  
總隸之於是五寨三遊各據要害頗稱良法矣福寧  
州北界浙省東臨大洋背倚叢山上游之要樞也故  
於烽火門置寨曰烽火寨外以聯絡浙兵而福寧衛  
大金所協守於內福州之閩安鎮綰轂海口番舶商

編交通羣聚省會之門戶也故於連江之定海所置  
小埕寨隸於南路而鎮東衛梅花所協守於內興化  
地處東南之隅曲倭踪入寇獨當其衝閩海之腰膂  
也故於莆田之東環嶼置南日寨而平海衛及萬安  
莆禧二所協守於內泉州外連金廈控引澎湖東番  
灣即臺匪茹糾結相倚為姦右掖之巖險也故於晉江  
之外洋置浯嶼寨隸於南路而永寧衛及崇武福全  
金門高浦中左五所協守於內漳州西界粵省前倚

南澳東連金厦游氛往來控制不易甌粵之襟喉也  
故於詔安之井尾澳設銅山寨而鎮海衛及六黿銅  
山懸鐘三所協守於內明代兵制略具於此崇禎間  
海寇劉香老為崇繼以鄭芝龍邊境騷然多事其後  
芝龍就撫授為潮漳總兵資其扞禦海疆稍靖 國  
初芝龍入朝其子成功復叛以金門厦門為巢出沒  
於同安海澄之間 王師撲討同海漳泉皆宿重兵  
或駐滿甲不復因仍舊制後頗議款而成功益肆陸

梁會

上初即位誅芝龍 下詔諸將一意討賊兵部尚書蘓  
納海奉 命遷界自省城閩安鎮始北抵浙界之沙  
埕六百七十里南抵粵界之分水關一千一百五十  
里通為閩邊一千八百二十里築塞固守禁民外出  
其入海之水曰潘渡河曰銅鏡河曰廡村河曰洋尾  
河曰大梅河曰赤頭河曰雲霄河曰開溪河皆斷而  
守之昔之寨遊衛所大率皆棄置是時靖南耿藩提



兵一萬自粵徙鎮而又從納海之請加兵七千以壯  
居重馭輕之勢規制一變康熙八年都統濟實奉

命安兵稍拓舊邊然斗絕之境及諸洲島猶棄不守實  
又請益兵

上不許止令移閩安一鎮於海澄而以戍守閩安責之  
藩屬既而海逆內訌竊踞漳泉旋即迅掃蕩平盡收  
舊境於是提鎮諸營皆移海外而內地之守星羅如  
故焉今各營現在抽防內地者則有

詔安營遊擊一守備一千總二把總四兵一千名

額舊

雲霄營參將一守備一千總二把總四兵一千名

額舊

八年曾

駐總兵

漳浦營總兵一遊擊三守備三千總六把總十二兵

三千名

八年移漳州總兵劉炎防守漳浦懸鐘等處駐札雲霄後分設二處

漳浦城守營參將一守備一千總二把總四兵一千

名

八年係遊擊

海澄營副將一遊擊二守備二千總四把總八兵二

千名

元年以前不拘何處調兵三千防守元年議移汀鎮兵二千又加一千共三千名防海澄其汀

鎮另設後改用水師提督領兵四千防海澄八年提督奉裁兵歸陸營另移閩安鎮兵三千防守海澄

漳州營總兵一遊擊三守備三千總六把總十二兵

三千名

額

漳州城守營副將一遊擊三守備三千總六把總十

二兵二千二百名

灌口龍江營參將一守備二千總二把總四兵九百

名

灌口屬同安龍江屬漳州

同安營副將一遊擊二守備二千總四把總八兵二

千名

八年前因海上投誠兵一千八年又加一千

泉州陸營參將一遊擊四守備五千總十把總二十  
兵五千名

泉州城守營參將一守備一千總二把總四兵一千  
名

惠安營參將一守備一千總二把總四兵八百名

興化營總兵一遊擊三守備三千總六把總十二兵

三千名

興化城守營遊擊一守備一千總二把總四兵一千

名八年設  
二千名

福州蒜嶺營守備一千總一把總二兵二百名

福清營遊擊一守備一千總二把總四兵一千名從舊

長樂調兵五百名元年議歸併

長樂另設兵一千防守福清

長樂營遊擊一守備一千總二把總四兵一千名分舊

五百名守福清  
元年歸併長樂

閩安陸營叅將一守備一千總二把總四兵一千名

舊額陸營三千名元年加水營一千名總兵一八年調陸營守海澄

連江營遊擊一守備一千總二把總四兵一千名

舊設

兵一千分五百守羅源元年全調防羅另設兵一千守連江

羅源營遊擊一守備一千總二把總四兵一千名

舊從

連江撥兵五百名駐防元年全移連江兵一千駐防

福寧營總兵一遊擊三守備三千總六把總十二兵

三千名

舊額八年同

桐山營遊擊一守備一千總二把總四兵一千名

元年

議福寧州地濶兵單應再添一千名擇要害駐札

共二十二處其全營駐札不分調者則有

分駐廈門海澄水師提標叅將一遊擊四守備五千總十把總二十兵五千名

駐札銅山總兵一遊擊三守備三千總六把總十二兵三千名

桐山城守營遊擊一守備一千總二把總四兵一千

名

駐札廈門總兵一遊擊三守備三千總六把總十二  
兵三千名

駐札金門總兵一遊擊三守備三千總六把總十二  
兵三千名

浯嶼營遊擊一守備一千總二把總四兵一千名  
晉江營遊擊一守備一千總二把總四兵一千名  
圍頭營遊擊一守備一千總二把總四兵一千名



平海營遊擊一守備一千總二把總四兵一千名

海壇營總兵一遊擊三守備三千總六把總十二兵  
三千名

駐扎鎮東衛閩安鎮副將一遊擊三守備三千總六  
把總十二兵三千名

凡十一處諸汛地多向所不守以新定添設重兵與  
內地並存候閱定

乙丑粵督臣興祚撫臣士禎並詣行帳行請安禮北

向跪興祚奏曰臣自縣令蒙

皇上特恩擢臬司遷巡撫陞總督先在閩中鯨鯢未靖

臣曾捐軀血戰比至兩廣嶺表初平分遣將士剪除

餘孽今仗天威境內安堵臣於疆場之事無可効

力惟有潔已愛民赤心報國嚴加防守以固封疆伏

祈天使代奏士禎奏曰臣蒙調巡撫幸遇昇平時

和年豐境內寧謐但沿海居民雖經展界因海禁森

嚴尚懷疑畏開墾無多今蒙

皇上特遣大臣將沿海田土給民復業所至歡聲載道  
三月之間遂已開墾一萬餘頃皆由

皇上至仁普覆大臣宣布得宜故能如此神速其餘尚有  
拋荒地一萬餘頃臣等當率各屬捐給牛種資助貧

民不過數年可以全復至於沿海小民多以捕魚為活  
應許其小艇輕筏附近採捕庶饑困可蘇伏祈代懇

睿鑒允行臣臻受辭謹識之二臣頓首辭去又行三十里

止詔安是日興泉道丹連禮雲霄參將袁廷芝至

丙寅共登梅洲之八尺門望銅山

漳州府屬縣十濱海者四曰詔安曰漳浦曰海澄曰龍溪龍溪附郭元年畫界自粵界之分水關歷赤南

山鳳山亭至梅洲寨為詔安邊邊界以外斗入海三

十里懸鐘所附海十五里西張西岐嶺十里竹港梅嶺皆移共豁田地三百八十四頃有奇又平和縣豁免田地二十五頃錯壤也於梅洲寨因界設守八年

展界安兵十一處

分水關五十名十八葛十五名琉璃嶺五十名白馬坑二十名赤南

山十五名洋林村千總一兵一百名洋尾橋龜山把  
總一兵四十名華寮十名懸鐘嘴五十名梅嶺千總

一兵二百五十名梅洲遊  
守千把各一兵五百名  
今從詔安營撥守四汛分

關把總一兵五十名洋林寨千總一兵一  
百五十名東洋尾河十一名龜山三十名  
又從漳浦

鎮右營撥守八汛  
懸鐘把總一兵一百五十名梅嶺  
把總一兵一百名菜園浦十二名

公子店三十六名梅洲寨遊擊一千總一兵二百五  
十八名八尺門千總一兵一百名江頭汛七名烈與

八名  
候閱定  
烈與誤應  
作鼠與

詔安縣宋為南詔場有臨水驛元至正間右丞羅良  
命屯官陳君用城之弘治間置千戶所正德間設捕

盜通判尋廢嘉靖九年設縣治相傳名南詔者乃以  
風景類滇南云

龜山在縣西南二十五里上有巨潭禱雨多應有石  
洞可容數十人山之西有潮漳分界巡司度象頭而  
止山外即潮境矣

洋尾山有石井中有兩孔旱潦不涸溢

真武山前有官龕其形如龜後即洋尾石橋其形如  
蛇

大南山與龜山綿亘數里若巨屏然其巔產蘭

疑即赤南

山

梅洲有大陂溪經馬洋至大陂南繞梅洲村復抵漸  
山入海漸山在縣東五十里高峭千仞頂分二峯有  
潭深不測宋進士翁待舉陳景肅楊仕謹仕訓讀書  
其中種榴數百株號石榴洞紹興間有吳大成者當  
秦檜柄國時隱居是洞講明正學與莆田相陳俊卿  
遊處仕訓考亭門人也待舉葬其旁之甘嶺山土人

號曰知州山以待舉嘗知瓊州軍故也今於梅溪築  
砦以守梅河遶其南渡河為大梅山更南即海口名  
八尺門渡海面五六里得大洲金石洪淡二巡司及  
走馬溪在焉其東即銅山矣

走馬溪距懸鐘梅嶺各二十里

南澳遊故設欽總一員官署二一在南澳鎮之太子  
樓一在懸鐘所之宮前澳領戰艦三十四兵九百十  
八名彭山雲蓋寺走馬溪其汎地也太子樓在鎮城



之東有後宅城閩人傳海寇林道乾和人血築之  
彭山有三島其居人四姓有上彭中彭下彭之別在  
雲蓋寺東大洋中水深三十餘托倭寇閩粵來往所  
必經

懸鐘山斗入海中形如覆鐘相屬處如華萼亦為孤  
峯舊於其處置所城為周江夏所建操屯軍一千一  
百九十名在詔安東南二十里有果老山在城中四  
面八山連環相向其南有官前澳一名勝澳即遊兵

營汛防所駐也澳內可泊南北風船百餘又有東山望陽臺環所為洲者七曰蛤洲獵洲敏洲紅洲卧岡洲陳洲蛇洲南三十里為粵之柘林東行半潮水為鷄母嶼

甘山一名柑山在銅山南海中二山相對有大柑小柑之名山上有井水獨淡相傳仙人遺柑其上山下水深二十餘托東番澎湖倭賊往來之區中有一礁曰羊礁舟至此宜慎用單坤針三更可至南澳旁有

四鎮曰虎仔曰南村曰崎曰犬眠而柑山最奇遠望  
若一小髻天將風雨狀態百變若屏若屋若獅象之  
形

川陵山在銅山南半入於海相傳宋帝昺南渡將都  
南澳築此為東京地陷為海至今城堞尚存自山巔  
向海莫窮其際有屋材竹木時時浮出潮退後居人  
駕舟取以為薪其峯秀聳號曰蘇尖又號蒼陵又號  
東山其東隔海山若列屏曰杜浔科第踵出與是山

相接者曰虎岡山峯巒秀麗曰揭榜山東湖水出其  
下

是日行七十里止雲霄丁卯行八十里止漳浦

元年畫界自梅洲寨歷油甘嶺

高塘洋雲霄鎮大梁山高洋口苦竹嶺秦

溪村荔枝園浯江橋趙家堡張坑

至橫口為漳浦邊邊界以外斗入

海四十里月嶼二十里舊洋附海三十里虎頭山十

五里埔頭十二里後葛司十里洋尾橋杜浔七里舊

鎮皆移共豁田地一千一百六十三頃於荔枝園高

洋口因界設守八年展界安兵二十三處

大水窟三十名樹洞

把總一兵一百五十名長坑二十名雲霄南岸廖家橋把總一兵一百名北岸荷步千總一兵二百八十

名廖家樓砲臺二十名真頭二十名杜得遊擊一千總一把總一兵三百八十名南山十名眉田寨把總

一兵八十名苦竹十名荔枝園千總一兵一百三十名舊鎮十名下真十名黃家寨把總一兵一百三十

名保安二十名赤水十名臺山十名南山十名趙家城遊擊一把總一兵一百七十名將軍嶺千總一兵

一百六十名大帽山南雞今從雲霄營撥守八汛山冠山二十名高山二十名

十名埭仔頭十名廖家樓把總一兵五十名高塘十名荷步千總一兵六十名北真十名下寨十名埔仔

五又從漳浦鎮中營撥守八汛石峽仔十名真頭四名杜得千總一兵

二百名青墩把總一兵七十名杏仔三十名南山二十名山頭廟三十名眉田寨把總一兵一百五十名

鹿頭礁

三十名又從漳浦城守營撥守四汛舊鎮把總一兵六十名六鰲五

十名南景把總一兵五十名赤湖千總一兵六十名又從漳浦鎮左營撥守六

汛鎮海衛內大坑把總一兵五十名積美千總一兵一百名東坂把總一兵三十名連江千總一兵一

百二十名崎沙把總一兵五十名鎮海衛遊擊一把總一兵三百五十名候閱定

漳浦古名綏安縣孫吳永安三年置地在今雲霄鎮

晉時猶存南越志云綏安縣北有連山昔越王建德

伐木為船其大千石以童男女三千人舉之既而人

船俱墜於潭時聞拊船有唱喚之聲往往有青牛馳而與船俱見一名越王潭綏安縣不知何時廢唐垂拱二年復於雲霄之梁山下置漳州漳浦縣以漳水出其南故也開元四年徙於李澳川即今治也原屬附郭貞元二年徙州治於龍溪始為支縣

李澳川其源有三一自平和五寨一自南靖龍嶺崎溪一自盤陀嶺九曲溪匯流於此川

雲霄溪源出平和南徑雲霄鎮一名西林溪

綏安溪在縣南八都東流合於李澳川

漳江自西林出海水自銅山來迎之清濁合流而成  
章故名或云陳將軍謂此水如上黨之清漳故名

梁山在縣西南三十里有九十九峯其高千仞亦稱  
梁岳開元中鍾紹京作尉擇其可名者二十四峯以  
蓮花山為中峯有齊帝石齊武帝所賞也帝嘗仕宋  
為贛令晉安王子勛反糾之不從被囚南康郡獄族  
人蕭欣祖門客垣京等破械迎之出避難揭陽因至



此有水晶坪以產水晶而得名有晉亭峯以葛洪居之得名開元十二年十一月朔旦山出祥雲如天仙佛像麟鳳花草之狀彌亘百里經月方息是時天子封禪泰山都督辛子言以聞宋議郎吳與居於山麓多異書

雲霄山去梁山四十里以其高聳故名一名大神山俗呼大臣山山下即雲霄鎮山後有玉女仙人二峯將軍山在雲霄城西與大臣山隔溪列峙唐成將陳

元光居此元光字廷炬固始人父政以功拜玉鈐衛  
翊府左郎將高宗總章二年泉潮間蠻反政領嶺南  
行軍總管事出鎮綏安故地與許天正盧如金等三  
十人入閩保九龍山後得五十八人姓為援進屯梁  
山外之雲霄鎮卜居火田村令如金屯雲霄之修行  
里儀鳳二年政卒元光代領其衆元光通儒術習韜  
鈴年十三舉鄉薦第一及領州事廣寇陳謙結蠻酋  
苗自成雷萬興等攻陷潮陽元光討平之永徽間嶺

南盜起循州司馬高璇令元光赴潮潛襲寇壘俘獲  
萬餘嶺表悉平進嶺南行軍總管嗣聖二年請建一  
州於泉潮間益七閩為八許之以元光父子世守南  
土邊民畏服令建漳州漳浦郡於綏安世守刺史元  
光又請以部曲馬仁等為司馬從之境內稱治已而  
苗雷餘孽復熾元光討之為賊將藍奉高所害事聞  
贈豹韜衛將軍追封潁川侯後以數著靈異歷朝累  
封靈著順應昭烈廣濟王子珣字朝佩先舉明經授

翰林承旨學士及元光被害率武勇襲殺藍奉高奉  
朝命代領州事凡十九年卒謚文英子鄴字有芑舉  
秀才授寧遠縣令州人以刺史及伯梁不能其官詣  
闕舉鄴代領州事許之遂命為中郎將漳州刺史受  
事二十九年卒謚忠憲陳氏四世守漳皆能得民心  
至鄴子謨而失其官朝命柳少安為刺史猶命謨以  
中郎將檢校本州別駕少安令謨白觀察盧諶議建  
州治於龍溪得請州治遂移而漳浦縣治李澳川如

故謨後復以平廣寇功兼漳州刺史今將軍山下有  
陳王墓蓋元光葬父政處相傳葬後相冢者言山有  
王氣元光改葬大峯山以避之宋宣和間有傭人林  
機詣縣官言陳王將徙冢反雲霄有磚一坎在普賢  
院請遣五百人徙之發驗果然遂為徙磚詣故葬處  
越數日居人望見有數百人羣作即之獨機在耳久  
之又見有旗幟鼓吹自峯山下趨視之則新冢成矣  
由是居民益以為神山傍有火田溪即政初徙處也

民至今燒畬以田淳祐志載李氏者閨媛能詩有汲  
水詩云汲水佳人立曉風青絲展盡轆轤空銀鉸觸  
破殘粧影零亂桃花滿井紅又書懷云門對雲霄碧  
玉流數聲漁笛一江秋衡陽雁斷楚天濶幾度潮來  
問過舟其地又有靈著王試劍石

盤陀嶺梁山之支壑為入粵孔道舊置盤陀巡檢司  
漢為南越之蒲葵關唐李衛公德裕貶嶺南過此作  
詩云嵩少心期杳莫攀好山聊復一開顏明朝便是

炎荒路更上層樓望故關宋世號葵園嶺有無象菴  
在其下前此山多逸象為暴有頭陀吳姓祖華者搆  
菴久之民居日稠象跡遂絕因以名

臺山高數百尺平坦如臺近視與諸山齊海上舟人  
望之則見其特出羣峯上

大帽山在縣東北八十里高聳圓秀林木蒼鬱頂有  
黃茅若戴帽然又名戴帽山上有玉川瀑布新村石  
鼓龍湫潭寶珠石諸勝又有天湖悟道普陀金山碧

石龍雲石獅弘道八巖北行則為海澄南行則為鎮  
海衛

銅山所在五都一名東山明初易今名自縣西南一  
百二十里至其地縱橫各百里有城周江夏所築故  
設操屯軍一千一百九十名又有水寨欽總一員統  
戰艦四十五兵一千一百七十七名先置於井尾澳  
景泰間移此城依古樓山為固三面阻海勢絕險嘉  
靖間海寇吳平引倭攻圍數月不能下自來科甲不



絕稱文獻區古樓三峯中峯有南濱書院東峯有東  
壁書院城東西二澳各藏南北風船百東澳有塔寺  
曰東門澳上多怪石產諸藥品有石室可容二十餘  
人一石如船一石如人戴笠其下激浪狂湧俗呼大  
驚門更東有五嶼相錯所謂鐵釘雞心虎窟空及銅  
坑銅鉢也藏北風船十餘南一山高聳曰蘇尖泊北  
風船十餘更南曰鯊殼澳泊南風船三十餘更南為  
宮仔前泊北風船五十餘折而西為士負嶼走馬溪

泊南北風船五十餘商人往來及賊舟之自東番彭湖來者必於此收泊南會哨於懸鐘北會哨於浯與六鰲古雷井尾鎮海皆其汎地也

鼓雷山在縣東南五十里一稱古雷高出秀聳為銅山外翰有古雷後葛二巡檢司由杜浔後葛油澳以達於古雷皆並海曲行峻崖險絕蓋其地斗入海中如伸一臂也山瞰大海潮聲時至有如雷鼓相傳葛洪膏煉丹其上石竈猶存後葛所以名也下有井旁

多茶樹相傳宋幼主嘗於此汲水煮茶擲棄餘瀋久而叢生成林也山根多惡礁舟觸之立碎南北泊船皆可二十餘天啓癸亥紅夷嘗至

沙洲在銅山東南海中泊北風船二十餘為大洋外蔽商賈多行其裏西北對峙者曰杳澳近古雷可泊南風船五十餘萬歷己未賊袁進孝李忠率六十舟於此就撫

東墻菜嶼在沙洲東北海中二與相鄰而菜與在其

內冬月石礁涸出皆生紫菜故以名內有井仔澳泊  
南北風船三十餘

六鰲所在縣東六十里如巨鰲戴岳亦曰鰲山有城  
周江夏所建操屯軍一千一百九十名澳口有沙線  
水落乃出可泊南北風船三百餘線外又可泊五十  
餘內通舊鎮為萑苻出沒之區城東北五里許一山  
崛起曰虎頭山可泊北風船三十餘扈頭礁苦竹寨  
眉田寨皆在其內萬歷戊申紅夷駕夾板船入虎頭

山虜一防弁至天啓三年又至盤踞匝月五年為賊  
鍾之鵬所據廣賈路絕久之乃通其下有雙石生海  
中大浸不沒又有雙洲如門廣船入閩必經此

將軍澳在東墻之西可泊北風船四十餘下有礁曰  
將軍礁舟舶遇之輒碎濱海人多乘桴以取蠟相傳  
陳元光嘗駐兵於此或云古閩越王號駟力等為吞  
漢將軍使據險拒漢故以為名未知孰是海中島嶼  
甚多可指者曰魚腸嶼通鹿溪曰竹嶼有居民數百

家曰石城與亂石敬壘若城曰大桑小桑土宜桑而人業漁今人多呼大嵩小嵩也有浮沈與視潮漲減為小大漲若沈減若浮又有大澈小澈之屬嘉靖九年正月海中諸峯忽沒不見頃之三山併為一峯屹立摩空作樓臺之狀三日乃已蓋蜃氣云

青山巡檢司在將軍嶼之北亦一山斗入海者自丹竈山鐵竈坑南行三十餘里平沙漠漠可泊南風船四十餘折而西為燈火墩亦可泊南風船

井尾巡檢司在青山北南距鴻江四十里可泊船百餘內通白石赤湖佛曇橋萑符所出沒澳口多礁巡船必避之非朔至八九分不可入鴻江者黃如江也訛為鴻儒其出海處曰鴻江澳亦名鴻儒與天啓辛酉於其地設遊兵營把總一員乙丑又設陸兵一營澳口多礁惟淺船可入又不利南風夏至後巡船輒棄井尾去防守孤弱窺窬益多有愁城之名

鎮海衛在鴻江南十里有城周江夏所築操屯軍四

千九百名城三面環海太武山擁其後登雲龜嶺鴻  
歧五星諸山環其旁鴻江遠其南東旋南旋浮於前  
如龜魚泛水城中有山曰後山古山昭山曜山蒼山  
又有七星井柳樹井民居蕃富科第不絕太武山去  
衛五里一名太母山上有太武夫人壇相傳閩中未  
有生人時夫人獨先居此列仙傳云皇太姥閩人婺  
女之精即指此也其山周百餘里高千仞登其巔東  
望大海無際漳郡諸列城指掌可數其名勝有浴仙



盆仙人跡旁大石刻象徑雲根洞五大字有延壽塔  
營構甚工可坐十數人高數仞海舶望為標的有紫  
石佛高約三尺其質蒼白上現紫點如粟有小石城  
曰秦建德城又有錦亭峯石鐘樓九霄巖石眼泉及  
湟槃馬蹄百丈仙竈諸石馬衛左一石臂橫亘海中  
曰岐尾臂之南北皆可泊舟然非風便利北船不得  
歷尾而南南船不得歷尾而北一遇撞捩必立碎也  
東旋在東北南旋在東南水皆深三十托賊自彭湖

東番來者必以二椗為標從二椗用未坤針四更可  
達大小柑山也衛之東門常塞有識曰石狗吠金雞  
啼東門開賊就來嘉靖辛酉一開而饒平賊張連卒  
至陷城大掠而去其旁有半洋洲在水底東接龜嶺  
西接南鎮嶼如遇風晴見白浪一條長百餘丈亦名  
白玉礁岐尾之北有白坑冬月北風飛沙四集一望  
浩然故以名西望中左北望料羅近望東椗遠望圍  
頭皆歷歷也澳內可泊北風船百餘彭湖遊汎常於

此發棹焉又北為島美今日積美實島尾之訛耳舊  
有島尾巡檢司屬海澄縣衛城中有鎮撫司署及五  
千戶署豫備倉軍器局儒學旗纛廟又有東瀛書院  
祀朱子又有陳布衣周翠渠兩先生祠布衣名真晟  
字刺夫其先泉人篤志正學天順中詣闕上書翠渠  
名英字梁石其先莆人嘗知廣德州授紱歸與布衣  
同時講學鎮海故戎壘自有兩先生文風始盛兩家  
之先亦以戍至後遂占籍而長子孫也嘉靖中一齋

豐先生熙由翰苑謫戍於此始白當事祠兩先生惠  
安張岳為立碑產石蛭生海底石孔中類蛭圓尖上  
小下大殼類竹蛭而更紅紫石孔本小蛭長孔亦隨  
大海人用小鐵鑿破石取之

戊辰行九十里止海澄施將軍焯自廈門來會

己巳漏下四鼓同登繖船過圭嶼涉海七十里至廈  
門

元年畫界自橫口歷洪礁

獨石山關廂  
村蔡家庄

至三义寨為

海澄邊邊界以外附海十七里陳輝村十二里甘輝

村七里大江等皆移共豁田地七百八十四頃有奇

於石馬洪礁團山三义寨因界設守八年展界安兵

八處

團山把總一兵一百名大江二十名圳尾千總一兵二百三十名娘媽宮千總一兵一百二十

名中權關口三十名上恒泥港十

今從海澄營撥守

五汛

三都把總一兵五十名後境把總一兵二十名  
橄攬嶺四十名青埔三十名海門山十五名

又從漳浦鎮左營撥守三汛

石馬遊擊一千總一把  
總一兵三百一十二名

福許千總一兵一百四名三义  
河千總一兵一百二十六名

候閱定

海澄故為龍溪漳浦地嘉靖九年都御史胡璉以姦民多闌出通番者請置安邊館於海滄委通判一員駐理而闌出者益不止二十五年都御史朱紱用副使柯喬議欲以海滄月港等澳耆民充捕盜備倭都指揮蔡秀獨以為不可已復上議曰近署安邊館乃益知姦民曲折其船皆造於外島泊於外澳或開駕以通番或轉售於賊黨而嵩嶼長嶼漸尾海滄石馬許林白石等澳在在皆賊之淵藪也不亟窮治恐益

滋蔓議上忌者羣毀之秀坐免官亡何倭果大熾遂  
改安邊館為靖海館二十九年閩寇大起多據地以  
拒捕而月港亦為賊巢官軍於海滄白石鎮海野馬  
井尾分道逐擊賊始敗遁參將王麟追及於古浪把  
總劉一桂追及於荊蕪斬獲數百擒賊首許西池等  
及倭衆三千餘海疆稍靖四十二年以委負非專任  
特添設捕盜同知以治之四十四年用知府唐九德  
議即海防館設縣治割龍溪東境一都至九都之地

及漳浦縣地以隸之營構城署至隆慶元年乃成此  
綏邑所自始也蓋海之險在水有寘曲可以藏舟子  
自廣至閩歷詔安漳浦之境皆自西而東海在南面  
至漳浦之青山則折而北海在東面歷鎮海衛復有  
支海蕩而西入過大江至月港而龍江自東來會之  
海澄之為邑即在月港之曲故自來以險特聞也由  
是東行過龍溪歷同安晉江復為自西徂東之路矣  
國初海澄為寇據溝通其四面益成深阻黃梧來歸



始內屬然寇猶迫處廈門嘗宿重兵駐防後又屢陷於寇副將段應舉死之蓋以四面阻水運道易絕而賊駕舟薄城則甚便故也自督臣姚啓聖進克廈門邊患始息其地形北面阻海即支海之內入者城之北更築土城為提鎮駐兵之所外為總垣環之穿其西北隅為中權關別作鎮遠樓城於東北月港環其東為橋以屬於東門而席帽鴻福常春諸山聯絡於前稍東即鴻江山也由東北出圭嶼則大海矣予由

是以至廈門焉

月港通海潮其形如月番舶所湊

秦江疏作大江一名南溪在縣東六里許自三平經馬口城受漸山椽潯諸水滙為龍潭至浮宮入於海又有支港自南溪出接海門曰蘆沈港浮宮之潮逆流至南岐鋪頭山曰倒港今團山圳尾洪礁厚境諸戍皆在其西

圭嶼在海澄月港之東周廻五里一山浮水如圭故

名白圭與又名龜與其上雉堞象八卦之形取龜負

圖意

籌海重編誤為雞與蓋以閩人圭雞同音故也

晏殊類要云亦名赤與

又名丹霞與以其上有石朝色如丹晚色如霞也乃

清漳之門戶北為濠門巡司南為海門巡司稍出為

倒港荆與自明世凡石馬月港烏礁紫泥克龍惠民

石美海滄洋船出入必由此接濟勾引踪跡詭秘萬

歷丁巳邑令傅某因舊城擴置兵百餘人隸海澄營

築浮屠以備瞭望天啓壬戌紅夷五舟闌入登塔望

內地因復議增陸兵千餘人

海門山亦名胡使二嶼上下延袤數里綿亘一二三都又名荆嶼梁嶼荆嶼產荆木梁嶼古有水人水馬產於此先有居民正統間知府甘瑛以民多飢法徙其民於青埔社置巡檢司於五六都之地以控馭之今有戍兵

嵩嶼相傳宋幼主泊舟於此適遇誕節羣臣呼嵩遂以名

石馬鎮亦名石碼鎮在邑之西其北支海亦名錦江  
龍江之所委也許茂烏礁紫泥三洲星列迤邐而東  
其支海之北則為橋梁尾嵩嶼長嶼海滄許林頭諸  
境濠門巡檢司在焉即所割龍溪一二三都之地也  
今皆在界外支海之尾分南北流南流循邑治而東  
北流歷白石青礁石美自北岸東出合於南海籌海重編  
有衝龍巡檢司即充龍也省志無蓋已裁  
青礁屬海澄白礁屬同安二礁相對皆有吳真人廟

在白礁者曰靈濟宮在青礁者曰東宮吳真人者名  
本海澄人也生太平興國四年素食不娶善療病求  
之者如市景祐六年卒感其惠者肖像以祀會有虔  
寇禱於祠而賊酋死民賴以安益神之部使者以廟  
額請賜名靈濟焉慶元中封英顯侯開禧中加號英  
惠累封普佑真君祠祀徧於閩粵永樂十七年文皇  
后患乳岩危甚夢道人獻方用朱絲繞乳灸之問其  
名曰閩人吳本居白礁方施藥未還也覺而如方試

之患良已皇后嗟異使人入閩求得廟處勅封醫靈  
妙惠真君萬壽保生大帝仍賜龍袍一襲真人生時  
嘗與其族孫同開黃馭山道經青礁埋三击刺盟章  
於其上既歿而鄉人祠之雲嶠側方築宮有役夫狂  
呼曰此非吾居龍湫之陽吾昔有盟掘地得三击青  
蛇蟠其中遂於其地作東宮焉

元年畫界自三义寨歷江東橋

東尾九頭  
馬髻山

至蓮花村

為龍溪邊邊界以外附海二十五里海滄十五里烏

白十里姚嶼石尾等村俱移共豁田地三百八十二

頃有奇於龍江鋪江東橋因界設守八年展界安兵

五處

江東橋遊擊一千總一把總二兵二百名三義河把總一兵一百名玉洲千總一兵一百五十

名石美城守備一把總一兵二百四十名烏嶼十名今從灌口龍江營撥守

高浦

港十名候閱定

海澄故與同安接境而龍溪在其內本非邊海以海澄之北有支海內入故亦有遷界而龍江其重鎮也龍江一水而數易名其源出延汀界合寧洋龍巖漳



平之水而下華峯又合長泰諸水滙為潭曰漫潭兩山如壁渾泓淵涵流十餘里以其遠郡城之北也謂之北溪梁大同間有九龍遊戲其上故又名九龍江而龍溪邑名亦自此立矣宋大中祥符七年邑民網魚見有神龜負珠出遊因捕得之其珠圍三寸七分光彩燭天郡守危稹因改貢珠門為還珠門淳熙初陳淳字安卿家於此學者謂之北溪先生溪流又南逕香洲渡歷峽中出峽為柳營江舊志云唐末王潮

下泉福嘗駐兵故以名丁氏古譜曰六朝以來戍閩者屯兵於此挿柳為營江當海溪之交兩山夾峙可憑之以守西岸盡屬蠻獠唐摠章中陳元光代父政為刺史始遣人從上流潛渡盡平諸蠻名其所居曰唐化里以此言之柳營之名其來舊矣宋紹熙間郡守趙伯邊始作浮梁以渡嘉定七年太守莊夏易以板橋豐石為址醜為十五道而屋之名通濟橋嘉熙元年圯於火太守李韶易梁以石而不屋越四年乃

成長三千尺址高八尺醜水亦十五道梁之跨於址者五十八長八十尺廣博皆六尺即今之江東橋也橋之西有柳營巡檢司橋之東有江東馬驛其橋又名虎渡橋明晉江陳讓記曰昔欲為橋有虎負子渡江息於中流探之有石如阜尋其脈沈石絕江隱然魚梁乃因壘址為橋故名虎渡溪又南南溪來會之其會處曰福河俗名三汊河置戍營夾河而守在西者曰福河城屬海澄縣今又訛為福許在東者曰三

义寨焉南溪者以其遶郡之南而得名也源有二北源出禾溪永豐南源出銅壺小溪至南靖而合東逕康仙渡負山之陰又東過郡城南疏為三台洲南橋直焉又東過文山而會於北溪二溪合流入於海澄之支海龍溪縣置於梁輿地志曰隋開皇十二年併綏安蘭水二縣入焉綏安溪在漳浦蘭水不知所存或云即南溪也

玉洲城在福河之北與海澄之許茂相對陳布衣真

晟居之改名定山真晟生於鎮海遷居龍巖晚乃定居於玉洲即此地也其地初名坂尾似即石尾籌海重編所謂石美亦此地也去坂尾五里為白石山山多白石故以名亦名鶴石山有石空可容千人

龍江舖今設龍江營亦在福河北

華封嶺即華峯在城北亦名龍頭嶺高千餘丈北溪經其下二十里為九龍山其山北有九龍水宋陳堯佐詩人生五馬貴山有九龍游是也別有九龍嶺通

潮州其下木棉菴即宋鄭虎臣殺賈似道處

庚午登白石嶺望金門白石嶺者廈門之主山也連上三嶺乃至絕頂仄徑斗絕海風飄蕩欲引人去四望大海羣山環匝真海外要區也

辛未自廈門登舟過高嶼遇大風歷劉五店洒洲宿石滬海岸同安境也去縣二十里

泉州府領縣七邊海者四曰同安曰南安曰晉江曰惠安晉江附郭元年畫界自蓮花村歷烏頭

孤山鳳尾山灌

口寨亭溪橋方坑嶺浦頭寨石  
得踏石山三忠官巖山店頭舖  
至小盈為同安邊邊

界以外附海二十里埕頭潯尾十五里馬鑿唐厝港

五里鼎尾皆移共豁田地一千九百四十一頃有奇

於灌口寨亭溪踏石山設兵駐守八年展界安兵十

四處

通津山千總一兵二百名文圃山莆十名周山  
窰把總一兵九十名灌口千總一兵一百三十

名前廠二十名烏頭山十名下店守備一把總一兵  
一百七十名板橋十名美人山十名西岸窰頭五十

名東岸石潯千總一兵一百四十名對窰頭後社十  
名馬家港守備一把總一兵二百三十名龜山二十

名  
今從同安營撥守五汛

潯尾把總一兵二百名劉  
五店把總一兵一百名下

店把總一兵一百名石潯把  
總一兵一百名大登二十名候閱定

同安縣唐為大同塲閩王延鈞僭號升為縣紹興間  
始築城其形東西廣而南北隘如銀錠故名銀錠城  
又城南溪有二石銅色而魚形故又名銅魚城

大輪山在城東有畏壘菴朱子為主簿時所作也朱  
子嘗名其廨中之軒曰高士又聚徒講學於菴中各  
為文以記菴傍有梵天寺公所嘗遊處也嘗書十六  
字於法堂中曰靈光不昧萬古徽猷入此門來莫存



知解又有戰龍松三大字鐫於石壁絕頂眺望最勝處有隸書極目二字焉

大鳳山在城北三十里山勢延袤形如鳳翅故名朱子嘗有詩云門前寒水青銅闕林外晴峯紫帽孤記得南垞通柳浪依稀全是輞川圖

文圃山在城西六十里與海澄接境南濱大海四望圓秀號十八面山以多文士故名唐謝脁與弟修讀書於此脁登文德五年進士詞藻過人南唐主簿洪

文用與族人洪澤宋皇祐元年進士石賡崇寧間石  
黃皆居此嘉定間鄉人楊志作三賢堂祀脩文用及  
黃西蜀何致一為記有龍池滿慈院建於其上賡為  
之記曰文圃山土無頑石木無荆棘層巒疊嶂之間  
松蘿幽邃翠色如畫深洞長谷自然天成佛氏之祠  
幡刹相望以雲名者凡四曰雲嶽雲峯雲泉雲嶠皆  
其支峯也又里許為夕陽山其山在西方最高遙接  
落日故名上有遁跡巖唐宣宗嘗龍潛於此依黃檗

禪師於真寂寺作詩云惟愛禪林秋月空誰能歸去  
宿龍宮夜深聞法食甘露喜在蓮花世界中按福清  
縣黃檗山已載此事洪州宣州亦載之

苧溪山去城西三十里下有苧溪出白桐嶺蛇蟒所  
蟄色多黑為涉者病大觀中邑人徐誠始為橋唐宋  
時虎豹所窟穴今則坦途矣山下有陳婆陂亦唐宣  
宗命築云宣宗微時有陳婆進麥飯問之曰旱田所  
產帝即位命有司築陂曰蘇營陂灌田數百頃俗訛

為陳婆

五通嶺在縣東宋幼主避元兵至泉聞蒲壽庚之亂  
止郡城北法石寺越過城南下輦即今下輦陂是也  
過五都龍窟有三巨石連接水中由此登舟謂之御  
踏石又至莊坂尾是謂五通嶺路傍二大石高四五  
丈如門文天祥大書龍門二字刻石龍窟亦以宋主  
得名

泗洲嶼在縣南海中周圍二里以在邑之丙位故名

稍東有白嶼周四里縣治東西二溪之水經此南下其傍又有鼠嶼海澳盡處即石澗也白礁巡檢司錯入龍溪境負山面海陸行崎嶇咫尺不易度水道則瞬息耳頗為匪類所窟宅高浦千戶所有城周江夏所築故設操屯軍千二百五十八名西距馬鑿東有深青驛稍南即澗尾也為邑之西南障轄墩臺七前有寶珠嶼沙嶼也可挿竹深入丈餘風颺水漂沙聚自若劉五店北為同安港西為五通白嶼南為烏沙

烈嶼東為澳頭大嶺再東為角嶼門嘉靖壬戌倭從  
此入天啓四年設把總於石澗尋議撤以省餉諸境  
遷海時俱在界外

大嶺與周五十里有沙路可通內地兩涯相去七八  
里宋建隆初里人葉祝斃石為路疏橋以通潮汐已  
而圮乾道中僧宗壽欲修之尋卒見夢於其侶道震  
卒續成之路長千三百丈為橋六

小嶺與在大嶺外其地有鐘山宋時嘗創章法院山

之北為丘釣磯先生隱居處先生名葵生宋季有文  
名元遣御史馬伯庸來徵托治圃自匿伯庸率達魯  
花赤齎幣至家力辭不屈伯庸不能奪悉取其所著  
書以去今沙間有大盤石相傳為先生釣石又有天  
與石方二尺許上鐫碁局及字一行云萬機分子路  
一局笑顏回亦云先生筆也又有仙人井在沙間石  
上潮至即沒潮退即現甘冽如故日可給四五十舟  
廈門者乃嘉禾嶼地嶼在海中屬嘉禾二十一都至

二十四都以曾產嘉禾故名廣袤五十餘里去縣七  
十里中左所城建其上故設旗軍千二百四名城南  
三里有廈門港遶城之西與鼓浪嶼鹿耳礁相對為  
中左之門戶明初有水寨在浯嶼設欽總一員後以  
其孤遠移入廈門而寨名仍舊焉中左之境東抵烈  
嶼金門南至大小擔嶼西接海澄五嶼北至同安內  
港與高浦相望遶嶼墩臺凡九曰廈門在東曰東渡  
曰高崎在北曰流礁曰五通在西曰東澳曰徑上曰



井上曰龍烟在南

籌海重編有高浦塔頭二廵司志不載

其汎地則惠

安之崇武晉江之祥芝永寧圍頭同安之料羅曰最

衝惠之獺窟同之官澳曰次衝其會哨南會銅山於

擔輿北會南日於湄洲為首尾聯合之勢後又設浯

銅遊把總一負統戰艦二十二兵五百三十六名駐

中左分兵二哨一屯舊浯輿一屯大擔視賊所向隨

方策應此當時戍守之舊也天啓壬戌癸亥間以紅

夷寇掠置廈門銃城一曾家澳塔頭銃城二別設戍

兵尋以省餉罷 國朝久為寇據近始廓清帥府建  
牙雄踞海外不侔於前代矣其中名勝有無盡巖五  
峯錯峙而最高者為洪濟山上有方廣寺雲頂巖晴  
霽可見日本又曰留雲洞兩傍倚石為門上覆片石  
曰一片瓦雞鳴登之可候日出也又有山高懸如蜂  
窠山前海中有七星石森列海面山麓洪塘有龍洞  
相傳有龍穿地而出上分三竇下通為一或於其傍  
作龍湫亭西北有嶺曰薛嶺嶺之北唐薛沙居焉沙

父曰令之本長溪人沙為龍溪尉因卜居於此嶺之南唐陳黯居焉黯潁川人十歲能詩領鄉薦凡十八應南宮試不第值黃巢之亂避地於此遂有南陳北薛之名黯讀書堂側有石高十六丈上刻談玄石三字土人呼其地曰塲老山薛嶺之下曰薛浦浦外有嶼曰離浦以其離於薛浦也度可在高崎西北又有動石在篋當港口潮至則自動又有浮沈石潮漲不沒潮退反沈天將風其上輒有吼聲土人又呼為石

虎礁有官榮石在龍烟墩宋幼主過此民有餽獻者  
悉予官陸丞相秀夫書官榮字刻之

鼓浪嶼縱橫七里在廈門之西圭嶼之東南望大擔  
北鄰猴嶼上多民居明初與大嶼小嶼俱徙成化間  
復舊約二千餘家率皆洋商也天啓壬戌紅夷駕巨  
艦攻圍把總宋九龍率居民力拒殊死戰斬酋長一  
人餘衆遁去撫軍行視戰處勒詩紀之因築銃城置  
戍兵一營尋以餉絀罷大石壁立刻鼓浪洞天四字

旁有巖曰日光巖又有黃牛嶼沙埂屬廈門曰龍腰渡古讖曰龍腰斷黃牛平嘉禾出公卿

擔輿有二曰大擔圍五里曰小擔圍四里在嘉禾之南西界浯嶼東鄰烈嶼二洋歸航至此如入玉門澳內可容南北風船五十餘宋幼主過此舟膠不能去擲棄累重以輕其舟時有光發水上漁人徃徃得古硯其旁又有檳榔嶼

烈嶼在金門之西中左之東周二十里

閩海實錄作百餘里誤

居民三千餘家南有城仔角西有青崎東有湖下諸  
澳環之在在可登地皆斥鹵島民航海為生遠出彭  
湖東番走死地如鶩城仔角可泊北風船四十餘天  
啓初紅夷入犯皆泊此嘗設兵二百戍之以餉絀罷  
地有吳山樓山牧山湖山吳山最大唐柳冕嘗置牧  
監於此故有牧山之名舊置烈嶼巡檢司築城以居  
與金門並峙

舊浯嶼在擔嶼西南海中北至中左南至鎮海各半

潮水周圍五里地屬海澄縣居民二千餘家稍折而  
內入為島尾卓崎破竈洋為盜賊出沒之區海澄中  
左門戶也明初設水寨公署於此成化間徙廈門嘉  
靖三十七年賊首洪澤珍勾倭入犯盤據舊寨為巢  
徧歷興泉漳潮之境三十八年五月賊首嚴山老引  
倭犯泉州參將王麟拒之祥芝石湖追敗之大岞其  
分隸別犯興化者指揮唐修拒之拳頭追敗之野馬  
又有犯福州者參將尹鳳拒之閩安洪塘追敗之梅

花山老就擒倭衆敗遁於是澤珍之徒始自毀浯與  
之巢以去四十一年倭復大入多陷衛所郡縣廣寇  
吳平復來浯與據舊巢以應賊是時賊氛大熾上命  
總兵俞大猷劉顯督兵討賊二將至則親搗浯與巢  
賊始遁去巡撫譚綸總兵戚繼光請復水寨於舊地  
萬歷三十一年有夷舟闌入泉郡城下不之覺也當  
事者遂議移浯與寨於郡東之日湖即石湖不守門戶  
而守堂與識者病焉天啓初紅夷入犯亦以此為窟



宅澳內可泊南北風船百餘

浯洲山在縣治東南百餘里大海中翔風里十七至

二十都地也廣袤五十餘里

閩海實錄周三百餘里

洪武間增

置金門千戶所設操屯軍千五百三十五名及陳坑

峯上田浦官澳四巡檢司

田浦陳坑二司尋革

居民萬餘家明

初科目甚盛地不宜稼惟恃魚鹽設鹽塲以權之峯

上在其東官澳在其北南有烏觜大帽西有烏沙金

沙而料羅一歧橫出於峯上之外沙線重護可泊北

風船百餘凡往彭湖東番者每中途遇南風輒就此  
收泊候壯風而後行計程七更至彭湖十更即至東  
番矣萬歷丙辰倭船嘗至紅夷亦數來天啓壬戌添  
設陸兵一營與水哨協守峯上之民勇而善戰官兵  
倚以禦寇常與小登大登鼓浪烈嶼諸戍聯絡相應  
焉山之最大者曰太武巖有玉几案蘸月池眠雲石  
偃蓋松石門石室蟹眼泉倒影塔千丈壁一覽亭諸  
勝又有大小雙山並峙若乳大雙回顧二里許結為

平林小雙蜿蜒而南為後浦金門諸鄉所城之南有  
寶月菴菴旁大盤石俞武襄大猷署所篆時亭其上  
以望海海中有島天將雨則明現晴則日光晶晶反  
隱不見號曰變山有五湖曰許坑曰湖山曰湖頭曰  
赤庭曰湖尾今赤庭湖尾已淤為田餘猶在也海中  
礁石潮落時見馬跡相傳唐時有陳姓者善牧馬馬  
大蕃息客來市馬者計所市之多寡倍與之及渡海  
仍得所市之數而已人以為神卒而祀之曰馬牧王

廟

壬申登陸行九十里止大盈是夜大雨

元年畫界自小盈歷東嶺至大盈為南安邊邊界以

外斗入海三十里石井附海十里雞籠山等村皆移

共豁田地三百七十二頃有奇於大盈設守八年展

界安兵四處

小盈七十名歌髻山二十名盤龍埔千  
總一兵二百四十名雞籠山二十名

今不設守候閱定

梁置南安郡今泉郡之地皆屬焉隋廢郡改為縣唐

開元中一析為晉江縣再析為大同場三析為桃林場四析為小溪場而縣非舊境矣故無城嘉靖三十七年縣被倭寇始築城

石井在四十三都在縣南八十里故設巡檢司山勢斗拔寨門外即大海也同安之浯洲晉江之安平商船往來必由此西即歌髻山南有營前澳北有紅漸山而鷄籠山又在其北大盈舖古名大榮以唐嗣聖間嘗設武禁州故名以音同致訛又有武禁舖東嶺

舖

困山在縣西秀銳圓拔如困風雨輒聞雷聲在困發航海者識以為準

靈岳祠在九日巖祠樂山神唐咸通中有僧募木作佛殿遇老叟為導得大木於永春之樂山又遇暴漲木自浮至因祠之於此水旱致禱海舶祈風多奇驗宋累封通遠王又加封善利廣福顯濟王宋時泉有市舶司每四月十一郡守同市舶提舉率屬以禱宋

宣和二年命市舶提舉張佑齋御香詣廟焚之

癸酉行六十里次泉州府

元年畫界自大盈歷龍源山

鷓鴣寨  
後渚澳

至洛陽橋為晉

江邊邊界以外斗入海五十里福全所三十里永寧

衛二十里祥芝澳十里東石澳俱移共豁田地一千

二百五十二頃有奇於觀樹塔山因界設守八年展

界安兵十四處

安海寨守備一千總一把總一兵四百八十名小龍源山十名馬坪山十

名日湖山十名衙口山二十名竿頭寨遊擊一千總一把總一兵四百四十名竿柄臺十名觀樹塔山十

名東安十名蚶江二十名南岸水頭一百三十名鷓  
鴒寨守備一兵一百五十名潯尾把總一兵八十名  
徑邊  
十名今從泉州陸營撥守七汛東石千總一兵一百  
名鷓鴒把總一兵一  
百名圍頭福全把總一兵一百五十名竿頭把總一  
兵百名深滬烏潯兵一百名永寧兵一百名水頭蚶  
江祥芝千總  
一兵二百名又從泉州城守營撥守一汛溪邊浯埭  
二十名

### 候閱定

隋始置泉州於今福州地而於今泉州地置南安郡  
唐景雲二年始改泉州為閩州而別置泉州於南安  
地屬閩州都督府此今郡所自始也郡北有清源山



一曰泉山通志引漢書顏師古註指此為東越王所據之泉山然考師古之時乃唐貞觀初所云泉州即今福州也其非此山明矣城建於唐其衙城北樓有歐陽詹貞元九年記尚存閩忠懿王王審知刺史留從效擴大之周二十三里有奇門六從效建牙時樓櫓甚壯自刺史陳洪進納土於宋始命撤之唐時西郭外有西禪寺刺史王延彬妹為尼居之延彬為拓城而包之於內城北松灣又有崇福寺蔡尊師葬在

焉陳洪進又拓而包之於內宋紹定中郡守游九功  
元至正中監郡僕王立又屢拓之於是其城益大至  
周三十餘里而佝斜不正土人呼為葫蘆城元時又  
呼曰鯉魚城皆以形似也相傳初築城時遠城皆種  
刺桐故又有刺桐城之名閩王審知者光州固始人  
也曾祖友祖蘊王父恁生子三人長曰潮次審邽次  
審知唐末盜起江淮潮與壽春王緒劉行全為羣盜  
流劫至汀漳緒以糧少令於軍中曰敢以老稚從者

斬潮獨與兩弟奉母以行緒欲斬其母三子泣請得  
釋已而軍中共叛緒殺之推潮為主觀察陳巖表為  
泉州刺史巖死潮盡有延建五州之地乾寧中拜威  
武軍節度使潮疾表審知為留後遂繼潮為節度使  
居福州而審邽亦以泉刺史累進威武武軍節度使居  
泉州唐昭宗在鳳翔審知奉詔得承制除授審邽卒  
審知以墨勅授審邽子延彬權知泉州事尋實授焉  
審知儉約好禮其下勸以建國審知不從曰我寧為

開門節度不作閉門天子卒子延翰嗣延翰建國稱  
王然猶稟唐正朔審邽子延鈞弑之而自立更名鱗  
僭號改元龍啓又改永和鱗淫暴子繼鵬弑之而自  
立更名昶改元通文審知少子延義弑之而自立更  
名曦改元永隆都將朱文進弑之篡居其位以黃紹  
頗守泉州永春人留從效者泉州軍將也攻殺紹頗  
而迎審邽孫繼勳為刺史歸於富沙王延政延政亦  
審知子也先是曦命延政為建州節度使封富沙王

曦性淫暴延政數以書諫曦怒遣杜建宗監其軍延政逐之即建州建國號曰殷改元天德至是從效及汀漳二州皆歸之延政據有三州南唐兵至延政給福州人曰南唐助我也福州人遂殺朱文進而自歸既而南唐克建州延政降而留從效亦執送繼勳自領漳泉二州留後南唐主李景建泉州為清源軍授從效為節度使尋封晉江王而福州竟入於吳越從效勤儉愛人王氏雖亡事其家甚嚴數發間使自通

於周世宗宋太祖尋卒無子衙校張漢思自稱留後而仙游人陳洪進又逐而代之洪進起戎伍為王氏軍將留從效之殺黃紹頗也洪進有力焉遂事從效為統軍使至是南唐主李煜即以洪進為清源軍節度使時宋太祖已下揚州洪進遣使自歸乾德二年宋改清源軍為平海軍授洪進節度使又官其二子文顯文顥太宗即位洪進納土歸朝居京師而泉郡始隸於職方矣按潮兄弟三人並以孝弟忠謹崛起

為一方之長雖子弟不類墮其家聲而閩人思之不  
絕吳越王錢昱既有福州命即審知故宅為忠懿王  
廟而泉亦有王刺史祠祀潮於崇陽樓自潮始起於  
泉而審知審邽及邽子延彬延鈞延美延武邽孫繼  
崇繼嚴繼業繼勳相繼為泉刺史當搶攘割據之時  
能保其境土為民扞難不可謂非貽謀之善潛德之  
報也後又繼以留陳亦在泉境泉雖支郡實為一方  
治亂所關故詳志之以為後鑒云

海疆至同安復折而北故泉郡之海在城之東面其南面之水曰晉江合安溪之藍溪永春之桃溪南安之金溪並會於城西以晉南渡時衣冠之族沿江而居故以晉名至臨漳門有石卓立如筍曰筍江臨漳門者城之西南門也岸傍一山俯瞰江流有大石從山股至麓長二百餘丈又插入江底宋初僧定諸建塔於石上因名石塔山皇祐初造舟為梁曰履坦紹興間易以石江又東至德濟門外曰浯江宋嘉定間



為橋曰新橋江又東逕溜石在江之南流甚險萬歷間建塔以鎮之江又東逕法石在江之北又東為蚶江至岱嶼而入於海北面之水曰洛陽江納惠安及本邑之水自康溪達於濠市至留公陂又合惠安沙溪之水東至烏嶼岱嶼合晉江而入於海沈存中曰水以漳洛名者甚衆水落於下謂之洛舊號落洋九域志作樂洋山或曰唐宣宗至此謂風土大類洛陽故名竟不知誰是岱嶼籌海重編作岱隊新圖又作

大墜又有小墜附其旁傳訛甚矣閩書岱嶼在海中  
介石湖北鎮兩山間亦曰岱隊門水深三十托商船  
入泉州港者必由此郡之水口山也海舟由此二日  
至高華嶼又二日至龜巖嶼又一日至琉球國

安海堡在大盈港北與南安之鷄籠山相對在郡城  
東南六十里古之安平鎮也原名灣海宋開寶中有  
安連濟者唐安金藏之裔孫也徙居於此土人遂易  
灣海為安海金藏本太常樂工則天時剖心以翊衛

睿宗則天高其義命輿致禁中選高醫禡桑土紘之  
閱日而蘇開元間封代國公配享睿宗廟庭其後人  
至今猶在宋為安海市東曰舊市西曰新市海舶至  
此就權號石井津建炎間創石井鎮設鎮官紹興中  
鎮官方姓者築城以備海寇明嘉靖二十七年邑令  
盧仲佃邑紳柯實卿甃以石萬歷三十四年添設通  
判館時一駐之有石井書院以泉不混潮故名舊名  
鰲頭書院宋吏部郎朱韋齋公松紹興初嘗為鎮官

公餘進秀民訓迪之子侍講考亭公熹後二十年為同安簿時至鎮與父舊客講論經義鎮人益勤於學嘉定四年鎮官游絳因士民請白郡守鄒應龍於鎮西為書院繪二先生像而祠焉命添倅在董其事在文公子也傳伯成為之記勒於祠旁

東石在安海東有獅頭獅尾二寨夾之產牡蠣最佳初生如拳石四面漸長有一二丈者房中輒有一肉大者如馬蹄小者如指頂海人火炙而取之謂之蠣

房亦名蠓袍亦名蠓山又一種生海中大如杯曰草  
鞋蠓東為泗洲塲稍南為白沙湖可通安海港港南  
一小嶼曰北旋賊衝也澳內可泊北風船百餘渡彭  
湖商船嘗於此放洋北上商船欲轉圍頭觜者常泊  
此候風天啓壬戌設陸兵一營乙丑以省餉撤

靈源山

題本作龍源山誤  
新圖亦作靈源

一名吳山延袤四里山頂

大而平又名大平山山麓有吳明宮又名吳明山宋  
時有吳明兄弟隱此也山高峻出於東南諸峯之上

有石曰望江石南瞰大海如在眉睫絕頂有靈泉大  
旱不竭有紫雲峯宋林知先生隱處死即葬於此旁  
有華表山與靈源相角立有元時菴奉末摩尼光佛  
云為老子西入流沙所化與他佛因緣異稍西十里  
為羅裳山山之東有五髻峯嘗有異人畫馬於峯前  
石上每天陰鄉人見馬馳驟旋即入於石疑即遷界  
中所謂馬坪山也有龍湫六井各相去半里所或在  
高原或在平田而泉脈貫通汲一井則五井皆動往

往有龍出入井旁樹木時有龍爪痕城南山大者有  
吳孤橫畫四山橫山長數里橫郡治南下有畫船浦  
沙面蹙紋時作船像帆檣皆具其帆勢所向可以驗  
風之南北南十里有蕭妃村唐文宗母貞獻皇后家  
所在也妃初為建安王侍者生文宗及帝即位冊尊  
為皇太后太后去鄉時有一弟命帝求之有茶綱役  
人蕭洪妄自言太后召見嗚咽不自勝拜金吾將軍  
檢校戶部尚書兩授節度使而太后真弟故在孱弱

不能自通有蕭本者探得其內外宗屬遂詣闕發洪之詐且稱已真太后弟詔追洪鞠問具服賜死拜本贊善大夫追封三代已復有晉江令蕭弘自稱太后弟徵詣闕三司按問兩人皆偽帝下詔曰皇太后齊梁望族僑寓閩中慶靈鍾集早歸椒掖終鮮兄弟常所咨嗟而姦濫之徒因緣假託乞沐恩榮既無可驗鑿空作偽豈得更容本可長流愛州弘流儋州由是太后卒不得真弟而蕭妃村之名獨存土人又名為



燒灰村焉有植壁港洩橫山以南諸水又南有陳坑  
港則匯井尾埭諸水皆入於海

陳埭以陳洪進所築故名一名浯埭以其為浯江之  
委也受羅裳東北諸澗之水入於海鄉曰陳埭鄉百  
鮮所聚地多衣冠茂族今置寨稍北為溪邊寨也

溜石鎮有東山亦曰高甲山有井方丈餘海潮時至  
終不相溷色嘗甘美葛洲溪合南安以下九十九溪  
之水流其下匯為煙浦埭出六斗門而入於海

日湖以日所出也故名一稱石湖在陳埭東舊語與  
水寨徙於此可泊南北風船六十餘有金釵山兩支  
對插如釵股宋政和間僧祖慧宗什等謂其地類明  
州育王建塼於兩支相交處殊瑰壯左股崛起一峯  
有石圓淨名鏡石峯西小巖名石獅巖相傳宋有僧  
貌類獅者隱於此或斲巖前石為泗州大聖像又名  
泗州巖又東有堤障飛沙以護田久而圯萬歷間寨  
帥沈有容令兵船出汛者必載石以歸因以甃堤因

得復故名沈公堤舊於此設沙堤寨相去里許有豐山寺寺前列石磊砢如羣羊為遊者所賞晉江以南初遷之境至此而盡矣

圍頭灣在泗洲塲之極東一山橫出海外為安海港之門戶故有巡檢司設於十四都地去縣百里宋時真德秀移戍軍於此

福全所在圍頭北八里有城隸永寧故設屯種旗軍五百七十五名可泊北風船十餘北為圳上澳亦可

泊北風船十餘又有大留澳皆要衝也北至永寧南  
至料羅各一潮水

烏滬故設巡檢司在十六都地南臨大海東接深滬  
西連福全

深滬故設巡檢司在十六都去縣七十里東濱大海  
北永寧南福全可泊南風船四十餘地有石壁山一  
名獅山舊志引陸魯望云列竹海滢曰滬蓋設以取  
魚故魚之躍出者為跋扈也豈昔為漁市故遂以名

其地歟有石刻深滄二字相傳為羅隱書傍有崇真寺祀真武神寺有井歲旱不竭底穿石竇號複井左為彌陀山有井名天竺井右為青山市心保有井名寶泉皆甘美給一方用地無蚊蠅相傳亦羅隱所識也明詹仰庇詩云層崖分五澳疊屋聳孤岡風土魚蝦市丘園粟麥鄉北有佛堂澳亦海寇出入必經之地

觀樹塔亦名關索塔西為竿頭寨與靈源接北為蚶

江寨與日湖接

永寧衛有城周江夏所築舊設旗軍六千三百九十五名地在邑東南六十里東濱大海北界祥芝南連深滬為泉襟裾嘉靖乙未為倭所陷屠殺兵民俱盡倭退後調泉南遊擊駐守可泊南北風船三十餘有益輔山擁抱衛城之後一名朝陽山以先受日光也又名瑞海以上有圓石如珠亦名驪龍山有仙人山在城中巨石盤礴上有仙人跡其石穿出城外半

里許控扼海濤嵌嵌崙崎文如篆籀奇怪莫可名狀  
皖人阮自華始表異之邑人黃克纘詩云浪有千層  
皆白練石無一片不蓮花又有象山亦在城中形如  
伏象

祥芝澳在二十都故有巡檢司距縣五十里東面大  
海南接永寧北臨支海與崇武相對澳內可泊南風  
船五十餘支海中有臭塗可泊南北風船二三百皆  
極衝地也有寶蓋金鞍二山俗呼寶蓋曰大孤金鞍

曰小孤相傳有辜氏二女沒而靈異土人廟祀之故  
曰大辜小辜久而訛曰孤大孤之巔有石塔宋紹興  
中僧介殊募建而俗謂之孤山塔又或訛為姑嫂塔  
謂昔有姑嫂二人皆為舶商婦商入海不返二女構  
塔而望之其即二辜之訛歟今塔中刻石為二女像  
游女拾覽以摛之云中者當生男子也小孤之上有  
石室四面無路但可從峯頂縋而下有趙永嘉者隱  
於此永嘉或云宋人與考亭同時或云元人與虎岫



巖僧嘉善交其在石室也獨處無侶虎為守戶人餉以食輒酬之草葉一楹其人不解所謂攜歸以飼牛牛輒熟睡不起始驚異再就永嘉詢之永嘉則又予以他草令置牛前牛乃復起更求之則不可得矣因名其草曰祥芝祥芝之名始於此明有高士趙復字無疾博學好古為一方所嚮慕年九十五卒學人私謚莊節先生虎岫巖在大孤南五里許巖石光潤林木蔥蒨與海上諸山絕異每八九月為士女遊嬉之

地

法石山在郡東南濱於浯江之北度可與浯埭相對  
陳洪進常築壇於此北向呼萬歲亦曰萬歲山下有  
法石院洪進妻及女葬其後宋有碧桃道人隱此既  
沒南外宗正趙必暉作詩弔之地產荔枝蔡忠襄荔  
枝譜有法石白出於泉州法石院色青白其大次於  
藍家紅藍家紅亦出泉州兄弟二人圭為太常博士  
丞為尚書員外郎晉江荔枝五月熟者為火山六月


熟者為早紅為桂林為金鐘王十朋為泉守有荔枝  
詩八章稍東為鷓鴣寨地有桃花山以土赤如桃花  
故名明蔡文莊公清葬於此再東為後渚臺三面距  
海外即岱嶼矣折而西北為徑邊臺再西為烏嶼  
烏嶼四面皆水嶼上可居宋寶祐中僧道詢募建石  
橋名鳳嶼盤橋長四百餘丈廣一丈六尺比洛陽橋  
長加四百尺濶高一尺海中遙望二橋橫跨若二虹  
然今已廢僅存南岸三水門屬於嶼而已道詢少遇

了角道人授以丹術徹悟宗乘勤行精進遠近信之  
又嘗構橋於峯崎獺窟而隱於白沙湖築堤捍海而  
田其中一日潮至將毀其堤道詢舉扇揮之曰海至  
大不能讓尺寸地耶潮為却行更西為洛陽橋

洛陽橋始名萬安渡極危險慶厯初郡人陳寵擬作  
橋不就皇祐間僧宗已募貲累年亦不就會端明殿  
學士蔡忠惠公襄來守郡始作石橋始於皇祐二年  
成於嘉祐四年壘趾於淵醜水四十七道長三千六

百尺廣丈五尺翼以扶欄費金錢一千四百萬橋心  
有洲置關其上晉惠二邑之界也相傳經始時淵深  
不可趾忠惠為檄使隸人入海拔之龍隸謂入海必  
死大醉卧沙上覺而視其檄則已易矣忠惠啓閱之  
止一醋字喜曰神告我矣蓋謂廿一日酉時潮退趾  
可立也及期果然橋遂得成或又移此事屬之明郡  
守蔡錫不知何據橋之北題曰洛陽之橋趙岍書又  
有亭曰濟亭趙不駘書也而忠惠手書碑立於橋旁

今隸人猶祠於橋中央之洲上忠惠又嘗種松七百  
里於閩部令行者得以避暘暑閩人為詩二章勒石  
以誦之一曰道旁松一曰洛陽橋



粵閩巡視紀畧卷四